

四庫全書

集部

欽定四庫全書

集部

容春堂前集卷十三

四

詳校官監察御史臣曹坦

中書<sub>臣</sub>劉源溥覆勘

覆校官中書<sub>臣</sub>康儀鈞

校對官中書<sub>臣</sub>楊世綸

謄錄監生<sub>臣</sub>張德燾

欽定四庫全書

容春堂前集卷十三

明 邵寶 撰

序

二十  
三首

許州志序

許州志志許州也凡州之事循名考寔原始要終遠以  
鑒古近以驗今無不備焉是故謂之志志也者史家之  
一體耳今疆域之類則兼乎圖建置之類則兼乎表人  
物之類則兼乎傳文辭之類則兼乎集攷異之類則兼

乎論辨似不純於一體者然而恐失於畧故求其詳恐失於浮故求其覈要於備焉而已此亦志之變也郡邑之有志尚矣是志之作蓋有繫乎一州而不專於一人之蹟將以傳於久遠而非獨為目前之談玩也竇嘗觀於其大有志封守者欲其慎固有志創建者欲其修繼有志沿習者欲其興革有志幽潛者欲其表章有志淑慝者欲其懲勸我所能為我則為之我所未能以俟君子是志之所以作也烏乎有天下之動而文籍生焉其

初蓋醇如也逮乎紀載日繁於是淳風漸衰而世變以降故天下之事亦為之而已矣奚有於志然名實之所以不紊終始之所以不爽往往於此焉賴是雖一家不可無乘況一州乎天下之大諸州之積也諸州之志備則天下無闕事矣況許自春秋分國以迄於今中間或為雄都或為望郡其事之所當志蓋有倍蓰於他州者我朝經理海內而許之為州寔處兩畿之間德澤在民物教化在人才制度在有司者萬世一日以今視昔地

若增而重焉則夫紀述治功贊揚盛美乃守臣奉職之一端也是以不敢不作作焉不敢不詳不敢不覈豈得已哉志凡若干卷始寶承乏至州即有意於是既而政務紛冗方負尸素之愧故因循七年始克成編舊志出於前知州五羊陳公今多因之其分類立例則寶竊用己意云

太康郭節婦詩序

節婦詩一冊若干首蓋太康郭氏之書也而君子取之

以為可傳於天下者詩為節婦作也節婦為前刑部郎中王公傑之女公為鳳翔推官時郭君浩者亦從父宦咸陽公館甥焉三年而沒節婦寡居內外無敘其志者或謂是足矣節婦獨曰未也盍歸于郭教吾子納吾子之室越若干年其子天子之室繼之或謂節婦盍歸於王節婦又曰未也有吾孫在教且室焉吾事也卒行其願以老烏乎一身撫兩世之遺孤歷四十餘年而終始不易節婦之所處豈惟能自盡而已哉婦以不二夫為

節節盡而能處其子若孫節之大者也故春秋於紀叔姬歸鄫特筆書之蓋其識知存宗祀是所謂有其節而能處者當是時使不歸於鄫而歸魯夫亦何損於節雖然豈叔姬之所以自處而春秋所以賢之者哉節婦之於郭猶叔姬之於紀其節同其處之也同君子通於春秋之義其不能無取於節婦也審矣然則是冊也雖郭氏之書苟傳於天下使夫虧於節與有其節而不能處者聞之一則以愧一則以興豈不大有補於風化哉節



婦卒於成化壬辰先卒之數月有詔旌表其門後十年  
辛丑其孫緒舉進士歷官戶部郎中論者以是為節婦  
之報實比守許去太康纔百里高節婦之風嘗欲有所  
紀述而未能也今與郎中君同官乃僭為之序節婦母  
矣而猶曰婦云蓋為天下舉重者言之而不欲視為郭  
氏之書也某非敢當君子亦竊取君子之意耳

翠筠軒詩序

節枝莖葉皆竹之有也而筠之在竹見稱獨多或遂以

名竹蓋竹以筠為體凡節枝莖葉之間通謂之筠至其  
用也則席於宗廟筐篚於朝廷簡牘於天下後世又皆  
筠寔為之而節枝莖葉不能加焉故傳曰如竹之有筠  
也此之謂歟然筠之為色唯翠者為多自籜解後更歷  
萬變翠未嘗易易則變變則雖有節枝莖葉摧敗繼之  
而竹之用於是乎窮故論竹者率以筠稱筠者率以翠  
此又物理然也吳君斯敏歛故家子游江湖間而以翠  
筠名軒其知竹者乎竹之為德多矣而君獨有取於是

者蓋卽一以求其全則凡截然為節翹然為枝挺然斐然為莖葉各色其色而竹之全德不外是矣況其為席為筐篚為簡牘又未可量哉詩凡若干首作者皆時之君子而寶為之序

少傅徐公壽詩序

弘治丁巳之歲今少傅謙齋先生徐公壽七十秋七月二十有一日為生之日時同郡大夫士之在朝者合若干人議觴以壽公公以上方軫念北邊有司修戒我其

與憂固辭不受衆不敢彊越二月疆場事少緩衆復因重陽節以請公辭如前衆乃言曰公盛德抑畏何乃至此抑公此意政某等所以壽公者也公以先朝舊學之臣入掌中秘再陟孤卿相事今上凡若干年心孚德咸寵倚兼至公亦毅然任重竭其忠貞以持國是雖羣務交集叅糾緣延未易卒定公茹以宏量鎮以雅重從容決之中外允服而民陰受其賜公乃不以為功每退食私第輒推至誠延訪俊乂及事利病視四海之內如視

其家欣戚係之得一人惟恐不用用之惟恐不亟在易  
泰之九二所謂包荒得尚於中行者公之謂矣至與一  
二元老出入僉謀可可否否惟天惟民惟君惟國惟善  
所在不必在人不必在己此其休休有容於秦誓所稱  
亦罔讓焉是以數十年間百僚庶工胥師胥遜無復嫌  
忌之習說者皆謂俗尚丕變而不知公之風采有以表  
儀於上也由是論之則公之身繫天下者甚重而憂形  
話言至忘其年之為慶公之心天寶鑒之書曰天壽平

格保乂有殷繼自今公壽未艾而勲業日以益盛豈非  
天貽我聖明為壽天下之地哉某等所以壽公者蓋其  
在此而公何乃固辭之雖然以地以事公天子相以位  
以道公天子傳壽公之心誰其無之而分乃未敢今日  
之舉壽以天下禮則鄉人不亦可乎於是公不能止衆  
遂相率成禮而退退各為詩一章用紀盛事實不佞辱  
公愛厚僭為之序

重陽會詩序

重陽會詩者吾鄉諸公官於東署者作也繼是將不一  
作焉故詩以節名夫詩以節名者會以節舉也劑暄涼  
之候酌疏數之宜莫大乎節天時且然況於人乎故今  
為會始元夕次上巳次清明次端午次七夕次中秋次  
重陽次長至循環終始擬諸天時以寓無窮之意而我  
同鄉在朝者雖有二十餘人然署各疏隔不能時時相  
與也惟世卿在稽勲世恩在主客廷伯在都水文光在  
翰林而予與文美士弘嘉言國聲五人者在戶部署既

相近出入起居朝夕無間於是而節舉一會以要鄉盟此亦人事之不可已者也其所以必有詩者蓋吾人之為會非為飲食言笑以流連光景之云也考德將於是焉觀學將於是焉使不假夫古者陳采出納之遺而覘之其何以資麗澤之益而自別於羣居終日者哉由是觀之則所以為詩者固非誇多騁速搜異銜新屑屑工拙間以啟輕忌之端者矣戊午重陽寔惟初會而予不敏敢僭為約曰凡會人為詩一章章書一簡者九主藏



其一宿分其八積之一歲為簡八十有一各成巨帙彼此相通隨在具備不亦可常矣乎而命題限韻之類則會之日定焉諸公曰然遂如約所賦之詩題用古句庶幾古詩吾詩古人吾人也其目具左

### 水利事宜序

弘治丙辰都水主事姚君秀夫奉璽書治江南水利之政明年疏濬築捍漸底于績三吳數千里民懷其惠士服其識又明年水利之書出焉蓋集前輩論水之有關

於吳郡者而為之也都水之用心一至於是其績之用成也夫固在此乎惟都水具有本之學久矣而於此尤致謹者蓋賑備之策莫先水利水利之於民甚大於政甚難利之弗圖顧足為害故雖以順為道以鑿為戒聖功賢訓具在方策而時代異宜土方異勢溝防異制防理異用莫淵異度分合異軌昔之人專官以司窮年以肆尚懼弗習其或敢以害易利妨吾人大計哉此都水所以求之今不足又求之古而至於為書焉者也寶承

乏中州嘗從中丞徐公考觀汴堤及漢魏以來諸渠之  
故又嘗侍於少司徒劉公聞其所以治河者乃今得都  
水之書而閱之則南北之水亦畧可見矣使凡行水者  
皆都水其人水惡有不為利而為害也哉況水之在天  
下五行六職纔居其一又安得夫人之於事皆如都水  
之於水也竇於是重有所感作詩寄之以賀其成而都  
水得告西歸矣吾郡通判傅侯檜乃以都水所行事宜  
集為一編將與夫前所謂書者並刻以行其間相時因

俗益損興補不必皆出於書而書之為效亦於是乎少著矣是編凡四類曰敷奏曰榜諭曰辯論曰詩文總若干篇都水名文瀨信之貴溪人先由刑部主事出判吾郡以擢今職儒者之政所至有之不特水也通守亦職於水奉以周旋都水蓋亟稱之云

河山勝覽詩引

河山勝覽詩若干首吾黨諸君子贈史戶部文鑑監兌而作也戶部之行凡河南山東皆歷焉故題云爾夫茲

河山覽則勝矣惟茲行也地方數千里軍民吏士從事者不下以數千計勞者欲息困者欲蘓訟者欲平是亦一劇任也戶部何暇於此哉雖然夫人之為一人則煩二人則紓三人則逸四人則無事矣戶部之才不啻兼數人而已者也用其三四以治其事而其所未用者以之覽勝尚有餘力孰謂無暇之有今夫黃河天下之大川也太行恒岱天下之高山也嘗聞君子如高山大川信斯言也宜莫如戶部者德好相協自古已然戶部其

無躍然者哉夫是之謂勝覽而臨眺遊娛苟自別於俗吏者不足言矣

重刊橫渠經學理窟序

橫渠先生之學始乎泛求中反之正終歸於知要而精思妙契之功實貫乎其間故其為書有西銘有正蒙有理窟而西銘粹矣正蒙次之理窟又次之然理窟所載要皆出於自得則所以為西銘之粹者茲其地哉今西銘正蒙已列學官而理窟獨鮮傳焉間得舊本遂刻而

廣之以備張氏之書君子之志於學者其必有取云

王升之遺稿序

丙辰南宮之試榜出而詢焉得士之最少者四三人南  
昌王升之其一也升之年十五舉鄉試已稱俊才至是  
再捷文譽益起越明年例授安陸知州有惠民之政又  
明年以事去官家居或將理焉而升之病且死矣予知  
升之聞而悲之於是視學其地既弔其父國賓公而其  
兄鄉進士元卿時與其弟彥卿尚卿和卿皆為諸生亟

見亟問知升之者視昔為詳今元卿錄其遺文一編請予序之余以是而徵諸其為州者誠不負乎其文也昔人論士之致遠先器識而後文藝古今以為名言若升之者方懋厥修致遠之道可謂兼之而僅止乎是抑又何哉是編於升之之文十纔一二其才固未盡也然即是而究其所必至亦當以大家視之矣況由是以起問者而表乎其所自立所謂致遠者顧不在斯與雖然才而天者唐有李長吉宋有邢居實二子之在當時觀其



文者往往疑於其壽升之之文氣昌詞雅曾無可疑而卒與李邢同歸此又余之所未喻也升之名朝卿世為臨海人其居南昌自國賓公始

撫州府志序

古之為國者各有史官掌記時事今之郡古大國也顧無所謂掌記之職者是以文獻罕徵焉雖然有志志非史也或能修之以時無廢前傳無絕後載則文獻之徵於天下後世者是亦史爾抑何必如古之云哉撫為江西

大郡其地西南負山至郡治而平行曠然數百里下控  
江湖視他郡為庶為富為多才俊其事之宜志者繁矣  
宋景定中家坤翁氏嘗一脩之君子謂之有體迄於今  
若干年尚無續焉斯可為文獻之一概也弘治庚申胡  
知府孝暨同知趙瑞始圖再脩乃得里居之賢前行人  
姚君復亨知府徐君用濟以主其局而布衣黎詰實與  
編纂之任今呂知府傑繼而成之刻梓以傳凡若干卷  
其例一承家氏之舊而少加損益蓋無媿乎志云者雖

謂一郡之史可也夫國史列是非備得失而不敢純用春秋之法史固異乎經也志之於史名異而實同故亦得用史法法有不錄錄必實有不書書必直二者或缺史且不能信於天下後世而況志乎然直存乎人實存乎事事有稽古傳聞之異是以紀錄失真君子患之而墓碑家乘之類往往出於其時尤難盡信故直可必也實未可必也吾於其所未可必者而心誠求之欲必得焉以成吾直則是是非非得得失失公論在人亦莫之

掩矣由是政有所資俗有所考以為因革之地他日采於國史傳之天下後世天下後世之徵文獻者亦將不外於是孰謂志之非史哉書成之月予適視學至撫知府傑請序遂論以歸之俟知言者評焉

譚烈婦祠祀錄後序

右錄一編為奏疏祭文碑記傳序各一詩諸體總若干皆為永新譚烈婦作也烈婦宋宗室女遭元兵破城從其家匿縣學孔廟禮殿中既而兵至戕其舅姑暨夫節

婦被執義不受污及其兒死焉血漬於墀宛然其人形  
歷久不滅若有鬼物呵護之者故天下之言婦節者尤  
以為烈而祠在學傍歲有私祀行於丁祭之後肇自知  
縣烏斯道至今巡撫都憲錢唐張公守吉安時始建議  
上請詔列於典而烈婦之名於是益章矣方元兵之南  
徂也其勢甚迫時士大夫死命死制者後先相望而吉  
郡尤以忠義稱焉其邑里之間固宜有如節婦者然一  
死以全其身而使夫有貞妻舅姑有孝婦是豈獨為女

中之賢也哉昔漢宣帝詔褒黃潁川首以孝子弟弟貞婦順孫日以衆多為詞而辦集期會世恒以稱吏者顧不一及則守之為職亦可知矣公在郡若干年治行於天下為最扶植振舉不遺餘力而尤汲汲於此非學通古今而知所輕重者其能然哉歐陽子作五代史死事傳序引王凝妻李氏斷臂事謂忍恥偷生之徒宜聞風知媿論者謂歐公此史以治法繩亂觀其所叙而閔世之志見矣公之於政猶歐公之於史也是舉也宜為婦

節勸哉臣死忠子死孝激勵於素而異其成焉由一郡  
以及天下崇德尚賢培養元氣舉斯心加諸彼而已矣  
集之成也公既序之茲復以末簡授寶寶不佞謹書祠  
祀之故為政人告而死事始末顧若畧焉蓋有諸作者  
在也

漕政舉要錄序

昔者聖人繫易蓋嘗曰聚人曰財財莫大於穀粟穀粟  
之在天下必厚儲於京師京師人之大聚也儲不厚則

人心離故京儲天下之命有國者重焉然其初在民非耕也不獲非歛也不積獲且積矣非運也不至昔者秦人以陸元人以海皆運也然其為事既勞且險君子病之故言運者以漕為貴漕之法有轉輸有直達其論尚矣今之為漕者寓倉而支取諸轉輸比舟而充幾於直達自罷海運以來至是法凡幾變變屢則務繁務繁則因革損益之故歲積月累不可勝窮而斟酌擬議具足以為變通之地凡有志經世之士皆宜究心焉而況以



是為職者哉寶為諸生時嘗讀三原王端毅公漕河通  
志竊知其槩比舉進士由許州入戶部適有會曲之纂  
與今少司徒太原王公德華同以郎中檢詳漕法始末  
且得其在都水時所為圖志者觀之於是凡政之關於  
漕者粗若有見焉既而歷諸藩臬養士治民政以職異  
置是不講者餘數十年矣乃者仰奉明命承乏漕司視  
事之餘遂本二志所載徵諸戶部副牘又叅以席主事  
書船志張主事文淵泉圖次第手錄藏之卷筭以輔記

憶之劣端居靜思宜民裕國之道往往若有會於心者  
譬之為學有溫故知新之義雖不敢以勤自慰而亦不  
敢不以逸自懲也書重典章易尚通變並行不悖則存乎  
乎人焉爾矣寶不敏行將與聞廷議當從諸君子講而  
求之以為上獻錄凡若干卷曰舉要者未及詳也欲詳  
者盍於諸圖志求之

湖南道學淵源錄序

湖南道學淵源者錄宋大儒五君子之蹟也五君子者

為濂溪周子為明道伊川二程子為晦菴朱子而南軒  
張氏附焉蓋濂溪世家道州明道伊川生於黃陂而晦  
菴則與南軒屢為南岳之會是以統曰湖南而並錄之  
所錄者有詩有文為體不一而五君子之蹟在湖南者  
於是備矣初提學陳先生文鳴之為斯錄也蓋將以興  
起湖南之學者也而或者未得其意予嘗思昔孟子稱  
陳良楚產悅周公仲尼之道北學於中國夫周公仲尼  
之道天下之達道也然不遊中國則不可得而學焉由

是觀之道學之傳雖係於人亦係於地在理若有固然者湖南古楚地也由周而來二千餘歲矣乃有五君子者生長遊寓其間所講服者皆周公仲尼之道至於今流風遺澤往往未泯故凡學者之求之也蓋有不必出其鄉而自得焉者地同時異而學之難易係之提學君之意蓋出諸此或者又以濂溪道人卒葬九江程子洛人朱子閩人張氏則廣漢人也矧其平生所過殆遍天下彼凡一言一行莫不以鄉以寓各有錄焉湖南一方

夫焉得而專之夫道至周公仲尼天下所同尊也而稱其化之盛必曰東魯為天下望國豈有它哉近而已矣予嘗譬五君子之道猶水也謂水之流行遍於四澤而此謂淵源將不可乎繼自今有志於學者始於一鄉終於天下又尚論古之人不惟其蹟而惟其心五君子之道得則周公仲尼之道於是乎在方今聖化流洽與海遠邇道德風俗軌轍惟一湖南東魯此固提學君奉詔之志而其所望天下者抑豈敢後哉君醇學雅行正已

作人惟五君子是式其為道興建甚多茲特其一耳觀  
學者盍通求之錄凡若干卷

鄆都志序

古者國有史史必世官惟世故專專則實而審公而斷  
傳之天下後世而不誣若董狐在晉太史在齊倚相在  
楚是也今之郡縣蓋古列國之變然不得為史不得為  
史而志出焉志無世官則於誰作而可無世官而有世  
族世族者文獻之所在也族有人焉以學以政於時稱

才志之作舍是人將焉歸哉鄴都為縣國朝以進士舉者惟僉憲某菴先生而溫甫繼之所謂文獻世族者莫有盛於楊氏矣故論者謂溫甫宜為志固若職分然而溫甫亦以是自任采擇以求實去取以求公如不得已焉凡十有五年始克成編烏乎志之病也久矣而非獨才之罪也蓋附望以為雄其病也誇逞浮以為富其病也俗崇異以為奇其病也詭三者有一焉皆足以壞志之體況兼有之乎此無他執是筆者非宦焉之吏則游

焉之客所謂實且公者無恠其慙焉而未足也況才之  
在人又有稱不稱哉今觀斯志簡而不誇質而不浮正  
而不詭學以基之政以叅之而文獻之不可誣者於斯  
焉在君子謂斯志也其史乎古之為史者觀其所書而  
知其所不書故左氏釋春秋每致意於不書之故以求  
聖人之情其義精矣今天下言鄴都者多神恠之說而  
溫甫顧畧焉不書則其所書者其實而審哉其公而斷  
哉書曰絕地天通此天下之大義也以一邑之志而大



義存焉使其當國史之任又將何如邪溫甫有史才無所發而寓於此君子蓋深惜之其請序於予久矣至是乃克以復其亦以是也夫

重刊孔子家語序

孔子家語若干卷王肅序以為皆當時公卿大夫士及諸弟子相對問之言其正實而切事者既集為論語餘遂別出為此書相傳至荀卿送入秦府故不以焚滅然博士孔衍則言漢武帝世孔安國因魯壁書撰次以成

戴氏集曲禮乃取而裨益焉厥既入禮遂除家語本篇其說與肅稍異大抵旨則夫子記則門人藏以地異出以時殊其未列於經無足恠者朱子嘗謂家語是當時書然而不純烏乎得之矣寶讀春秋三傳及莊列諸子史漢諸書其間引孔子語或真或偽多可議者嘗欲手錄其詞竊加辨論以與天下學者商確焉顧識與力未之能也況家語乃古成書君子讀而思之因而辯論其純也准諸經其未純也亦准諸經以求合乎聖人中正

之則此亦格致之大端也或謂記者留此為病豈其然哉監察御史黃君希武視學南畿博求遺書此其一也頃以刊成屬其門生喻貢士義請紀歲月寶不敏謹述所聞為序

### 中和堂錄序

中和堂錄者吾友施君克和錄其先君子北野公所得詩文於人者也中和為公堂之名以之名錄尊其父也錄既成編克和授簡於寶寶因得讀之率一時名碩之

筆雖隱顯不同而時稱作者則一也可謂盛矣公以儒  
醫名吳中凡三至京師公卿以下皆禮為客及謝事歸  
縉紳東西行者多造其廬蓋公慕賢愛士老幼一節是  
以能致多如此不然則亦何有於是哉且中和云者斯  
道之大宗也吾儒以理而醫者以氣皆不外此觀公所  
以名堂則其平生從事可知矣是錄所集比興備於吟  
咏事理具於序論蓋不必登其堂而公之風采可以盡  
得之譬之丹青其可謂極似者歟沉窮觀所交遠觀所

主古之道也非鄉士則不能友於一鄉非國士則不能  
友於一國君子於公可以觀德焉古之孝子思其親者  
於凡居處笑語無所不用其誠克和以是誦之以傳之  
人人則公之心術精神將終身一日矣豈直居處笑語  
之間而已哉君子於克和又可以觀孝焉克和才瞻學  
充其進未艾所以為公顯揚尚有大於此者實不敏當  
為續書之

林氏家譜序

凡譜為家作也其要在辨族姓序昭穆明冢介嫡庶而家政行焉故天下之家各譜其譜而王道成譜之於世其亦可謂重矣然譜以脩理亦以脩壞壞之端有三冒望則壞養子則壞贅壻則壞故譜不可不慎也蓋嘗論是三壞者曰養曰贅多知戒之而望焉是冒雖士大夫亦或不免況庸人乎閩之林其族最繁其所宗也最遠道逢其人問之則曰吾某宗也今某公卿為伯仲行觀其譜而信之天下無異議焉今戶部主事魁廷元者之

為譜也則異於是蓋諸林滿郡邑獨據所知以為始祖而族姓辯代為圖系兼取歐蘇上承下繼而昭穆序人各著其所出而冢介嫡庶明所謂三壞者皆無之君子以為善譜廷元初以進士有事江西予方承乏視學一見為相知今予領督漕命道出臨清廷元適監倉政奉斯譜告予曰願有序也廷元之先自隱菴府君以下世以敦朴愷弟相承至於今韋布而詩書者甚多廷元博雅有志好學不倦其所樹立將未可涯觀其所為譜而

世德於是乎徵矣因書而歸之

送方伯徐公赴湖藩序

寶為童子時聞先生長者論鄉邦人物慨然慕葉文莊公之為人謂其廉介不羣名重當世稍長得其文辭而讀之又聞其立朝議論與其所以施於外藩者乃知文莊之學問政事足以追古人而上下之非直一節而已也自是每見其門生故吏輒詳詢焉有謂寶者曰文莊前堂內寢各置文正范公圖像退朝政暇拱手默對良



久乃去夫其若是也豈徒然哉蓋心孚神會前奮後興  
不啻親炙焉者是宜其所造之至爾也惜夫威儀日蹙  
有不得拜階下以望見之恨及來河南進謁於大叅徐  
公公以鄉晚命進之坐而論政首舉文莊所以待士者  
詔之又以文莊所謂水東日記者示寶寶退而考吾徐  
公之所行一本其所學不少移易其風采足以消邪心  
其操守足以愧貪俗蓋後文莊而興起者其言必稱文  
莊也亦豈徒哉寶嘗以為文莊不可得而見乃今得見

徐公焉夫范公與文莊皆吳產其出入將相大率皆同而所建立亦各彰彰於天下徐公敷歷中外茂著成績今又奉命布政湖藩其入以輔理蓋有日矣由文莊而希范公孰得而禦之吾見鄉邦人物之評又不落莫矣寶忝從屬吏之後方以慕文莊者事公而不獲終領其教狂斐之志竟何如哉故於公之行敢有言於執事謂後進之於先達道盛德而贊休聲以播於人人寶之心也若以當贈言之列則寶豈敢

送施別駕序

今天子改元之春首詔史臣修先皇帝實錄禮部請遣  
進士若干人分詣各省采集事之當錄者以備叅閱于  
時吾貳守施君以河南省檄有事編纂將行實與僚屬  
具酒殺餞於北門外酒半寶起言曰世之人有忠直而  
不信者潛德而不彰者愴邪姦宄而不露者事有是而  
或錯者非而或舉者一時之論晦而無徵則曰後世有  
公論焉後世之公論奚憑憑乎今之紀錄而已矣昔人

謂左氏傳失之誣胡文定之說春秋也乃多取之不得已也今夫理官之聽民訟成案既具雖有大吏者徵詞而閱實因而決斷者什九從而平反者什一何則彼其始定之辭則然也史也者天下之大案也總裁也者天下之大吏也君之為編纂也聽乎詞以定案者也大吏將於是而徵焉書曰察辭于差差不差出於民之口察不察係乎吏之聽史之成與獄之成孰輕重乎君其辨之矣勿以一方為小勿以一人為寡勿以一事為微勿

以一時為近天下一方之會也衆人一人之聚也萬事一事之集也萬世一時之積也君其慎之君學問博洽壯既困於禮部晚復屈於有司其更事且多今其行也豈患其不慎哉惟古人贈言之意不敢不告耳君起謝請書為序

送石汜水赴召序

環府州而列者皆縣也此得一人焉以為令則其民欣欣然有生意彼不得者反是一人之後復得一人焉繼

之則所謂生意者不泯而愈滋是其民之幸也苟今日  
得一人矣而繼此或不得吾見生意轉為戚容地若易  
而異者夫一縣之休戚係一人一人亦易得爾然方千  
里或七八百里而為府四五百里或二三百里而為州  
府州之所統不下數縣不得其人民有戚容者什八九  
而欣欣然有生意蒙得人之幸者纔一二而已甚者咸  
無焉此豈激勸之曲有未至哉今之制縣令有治行者  
率內遷數十年來聞某縣起一人為御史矣曰此廉而

材者也又聞某縣起一人為御史矣曰此勤而能者也  
人人而詢事事而核歲歲而計起一人必拔其尤激勸  
之典如是其至而得人之效又何其難也蓋激勸之典  
懸於上出于一時而士之所學所養則蘊蓄於中而定  
於平生平生有是學有是養則固是人也彼懸於上而  
出於一時者得之固可無加榮焉不得亦可無加辱焉  
自一命以至卿相皆然而況一縣乎藁城石君邦秀以  
進士來令汜水至是六年矣其所行寬而有節簡而無

缺汜水之民所謂欣欣然有生意者與疆域廣狹施及  
隣境亦質平焉故鄭一州縣凡四開封一府縣凡三十  
六得一人如君者一汜水而已豈惟一府一州哉雖一  
省之內縣加數倍得一人如君者亦不數也可謂難矣  
君藁城望家世以經學相傳蓋有所蘊蓄而定焉正吾  
所謂其人者其有聲於一縣固其素也使天下之為縣  
者皆如君則得人之效又何患乎其難之有寶與君以  
場屋事嘗再聚於汴遂為相知蓋望其為御史久矣今



茲之召方將走書為賀而其縣文學孔君乃以祖道之序見屬寶故道君之為縣而能幸其民者以為贈蓋為君言之而非敢妄論夫天下之事也若夫君它日之政之大者寶不佞請于汜水觀之

送楊戶部使甘肅序

弘治甲寅冬甘肅有邊警守將以聞詔司馬治兵司徒會餉大為戒備越明年乙卯春復有言者詔廷臣議可否僉謂兵宜振不宜輒興而所謂餉者則當預為之處

大司徒乃請勅其屬才且練者一人往蒞焉於是陝西  
司郎中壺關楊君以選當行凡我僚友無不壯君者或  
為歌詩以贈而謂寶宜序寶謂楊君領天子命而督運  
於西陲其事甚大在它人或難而君為之甚稱大司徒  
其知人哉楊君讀古書見古人處邊事成敗利鈍之迹  
蓋嘗一一熟籌之矣自君為主事時嘗領命稽閱居庸  
等鎮倉儲其為員外郎也又嘗領命贊漕事於東南及  
為郎中實司陝西諸邊諸邊奏請歲無虛月君按章覆

議例比義斷左酬右應動中機會所謂出納舒縮進止  
速緩蓋其素具也今飛輓者告勞屯戍者告病庾廩告  
虛士卒告乏兵非有加食乃不足此其故何也君行矣  
將有新政邪將舉舊政而復之邪夫亦去其害政者而  
已雖然去細害易去鉅害難此知務者之所留意而深  
察也夫國家之患在戎夷而疆場之守在兵食食既足  
有自奮之兵兵雖精無自足之食食之所繫亦大矣哉  
詩曰載馳載驅周爰諮諏君奉勅外幸畫一敬獻天子

施行焉此亦使臣職也寶不敏何敢序諸公之作哉聊以是為楊君告

送李大叅赴廣西序

人之言仕者皆曰儒吏異途又曰內外不同體其果然哉夫吏固不能為儒儒而吏也簿書之中有義焉於從政乎何有然吏於內者親上典法為密吏於外者親下事情為滋密者所以處其滋必盡其滋而後可以言密由是觀之則內外不害其為同而儒之與吏又安在其

異也哉南海李君元善始事白沙陳先生得靜虛之趣  
繼而北遊京師聞見日博而學問文章益贍以雅益所  
謂儒者也及登進士累官戶部雲南司郎中兼京兆及  
東南漕事京兆多豪猾往往欲有所撓而漕事之宜又  
歲更月異君一斷以義理不亟不徐卒底於成在位若  
千年奏凡數百上上輒得允今年春吏部舉最當遷上  
擢君廣西左叅政命下之日君語諸僚曰吾久服在內  
行之外也將若之何夫君之為斯言固周於慮者然內

外之不同者體耳體不同而理同舉以措之宜無弗達  
矣蓋政莫大於典法天下烏有廢典法而可行者哉故  
以典法而驗諸事情則非具文以事情而稽諸典法則  
非臆見內惟是外亦惟是而後謂之良吏它日以牧伯  
最君者當猶今也而奚慮焉勞於外而復陟於內為天  
子之大吏以收儒者之成功其尚有望於君矣君行同  
朝大夫士與君遊者皆有詩為贈而以序屬實實不佞  
竊謂詩可不序也儒吏內外之異同則不可不論也於

是乎言

送僧會定志序

志兩住惠山凡二十年今年乃用薦者為縣僧會夏六月來京師得選而去去之日予因而想九峯於煙雲千里之外有餘情焉志為僧將以遺脫世累為其道顧舍其山中之樂而役役於一官何哉或謂志於其道也淺於是乎官烏乎君臣之義不可解於心天地之間雖欲逃之焉往而逃之志也井而飲田而食桑麻而衣裳安

居無患於草木泉石之間其亦知所自矣縱不即我攸  
居而其不能解與其無所逃者固未嘗不存焉況敢自  
外於有司之薦乎蓋吾猶恨其下山之晚也志歸哉祝  
釐之餘尚以是告其徒

容春堂前集卷十三



欽定四庫全書

容春堂前集卷十四

明 邵寶 撰

序

二十一首

重刊兩漢文鑑序

予讀唐柳子序其弟宗直西漢文類謂其條貫森然可為學者之端嘗以未見是書為恨頃者訓導黃雲自瑞州來視予西漢文鑑一編則宋人陳鑑氏所集凡漢文之散見於紀傳及選苑諸書者皆在焉意柳子所謂森

然者殆不過是是可傳已安仁洗知縣光重刻之而請予序予也聞之今君子之論文者皆曰西漢為其近於古也抑尤有古者而必曰漢云漢云豈不謂夫漢之文通於今也哉今去漢已遠文之用於世者若冊誥若制詔若奏對書檄贊頌詩賦之類猶夫體焉而漢雅醇矣雅醇則於古為近近之則可復復古於通今之中君子於天下皆然而獨文乎記曰醴酒之用玄酒之尚葢物之兼乎古今也久矣漢之文在古諸酒其猶醴也古可

用也今亦可用也夫是之謂通然自今視之則有玄酒之風焉由是而復古固其漸哉此君子取之之意也若夫有道者其文以經為師時而出之變而通之存乎其人關乎天下之運而起衰振陋蓋有不假乎力者寶也不敏請從諸君子而深論之雲所藏本本宋刻其簡帙甚約於簡閱為便今稍加於舊凡若干卷皆貴溪諸生鄭寅所校也同刻者又有東漢文鑑若干卷序方論西漢故弗及云

大學衍義重刊序

為人君而不知大學無以清出治之源為人臣而不知大學無以盡正君之法此西山真氏序衍義之言也寶嘗觀衍義之為書實為治國平天下而作其條分目疏顧若未及然其稽證古今極於世變通于天下之故者則皆指事切理原諸性命而議其所安鑑懸表植由此以應乎彼有餘地焉所謂治平之地益悉具於是矣是誠足以羽翼經傳為萬世君臣之監欲知大學者其可

外是而他求哉惟我皇祖覽而悅之特揭廡壁以資聖  
學列聖相承用於經筵益加崇重清源之治益有助焉  
凡今之臣欲求自盡於上亦執是以往而已寶承乏視  
學謂諸生皆學為臣者亟以是書課之而苦板本未廣  
乃訪求舊藏屬九江守周文濟重加校刻傳送諸學人  
給一帙俾之誦習庶幾由真氏之所衍以達乎程朱之  
所表章又達乎孔曾之所授受提綱挈領約以貫博蘊  
焉發焉粹然一出於正他日為臣祇承休德以著大學

之效此聖天子明詔作人之意也而寶也實欽承之故雖不敏不敢不與諸生共勉焉書刻既成乃復以為諸生告

新刊大儒大奏議序

儒者之學達則行於天下夫天下豈能自行哉致乎君而已矣告君之言固君子所學之蘊而不得不盡心焉者也孔子之告魯君中正弘大孟子之告齊君明快警切觀於其言而所以堯舜其君者可得而窺矣漢氏而

下以天下為志者代有其人然或學而非儒儒而未大  
故形之章牘不過隨時論事興滯補弊各極其說而全  
體大用往往缺焉欲望古人致君之功不亦難哉宋程  
朱三子學紹孔孟為天下大儒平生數對建請有書有  
疏有劄具載文集其原叙體要得孔子之純其分別事  
情得孟子之辨益於天下綽有餘地雖功業未究而人  
臣告君之法孔孟以後舍是將焉取哉昔蘓子瞻表上  
唐陸宣公奏議譬之經效醫方謂使聖賢相契如臣主

同時而歸於能自得師君子以為有識寶嘗以授學者而又欲其進於是也故有斯集曰大奏議者不盡錄也雖然程朱之道孔孟之道也孔孟之道堯舜之道也身親見之人孰無是心哉寶與諸生圖所以自為夫固宜自近始區區芹曝抑有若蘇氏者在雖懼僭瀆尚願獻焉

重刊靜修先生文集序

靜修先生容城劉公文集若干卷川浙舊有刻歲久鮮



傳有志誦讀者益深病之戶部主事李君時雍公邑人也近得善本於九江捐俸重刊歸公書院以惠學者比會寶於濂溪新祠具語其故且屬為序寶為諸生時嘗觀是集繼讀公傳而夷考其世益自宋伊閩諸君子後以儒稱者未能或先公也初公作希聖解其志已畧見之及夫聞風妙契能自得師而大精正貫之評出焉其識與力庶幾副乎其志雖年未及上而其造於道者深矣不然何其出處進退貞而且裕一至是哉論者擬公

兩生四皓世以為名言然兩生責漢以德四皓責漢以禮而不謂其世之不可也若公之世節義不立而天下靡然益大異於漢公產其地如碩果在剝眇焉獨存再徵再孫而自靖以卒知春秋之義者當有以處公矣尚奚以它求為哉雖然伯夷之不臣周也愛斯義焉爾也是以有登山之歌仲連之不帝秦也愛斯名焉爾也是以有蹈海之誓公負名義之重而力莫能與山登海蹈未盡其憤顧乃敢為危行而不敢為危言嗚呼秦人非

周也元人又非秦也甚矣世之為變於是益可痛矣而  
裕以成貞非深於道者其孰能之由是觀之則天下後  
世固有不假言而知公者況其言尤可傳也哉公之書  
有四書精義及是集集凡若干篇具諸體裁詞意所到  
壁立萬仞而洞視千古蓋不勝其壯也此其言之可傳  
實與行稱而孰謂其終於孫哉公沒之後歷勝國至我  
皇明二百年間建請從祀孔廟者無慮數十最後教諭  
李伸言之尤力此固天下後世之公論也孟子謂尚論

古人必自詩書始是集之鮮傳也其何怪夫遺恨於學者哉李君文雅介直無愧公鄉宜其汲汲於是君又欲求所謂精義者并刻以傳且申從祀之請其意可謂勤矣吾尤望其成因并書之

送陳嘉言分司天津序

吾錫自國初至於今以進士仕者凡若干人而山林之儒居三之一其以辭翰稱者則有某某政事稱者則有某某凡錫之人皆能指而數也寶不敢僭論乃今見嘉

言豈非其人哉嘉言幼克自奮種學績文將出而有為  
於時然性鯁介不能苟合由是獨以布衣進既得鄉榜  
鄉之人皆曰嘉言其某也其某也及第甲科為此言者  
愈衆今官戶部纔餘兩旬能持法以勝羣姦自大司徒  
下至同官皆謂嘉言稱其職宜獨錫之人知之哉然則  
嘉言將不止於所謂其人者矣昔孟子論善士自一鄉  
一國極於天下又欲尚論古人焉君子之志固如此實  
為嘉言鄉人竊有志於古也而欲告嘉言久矣因其天

津之行遂以贈之若夫出納之政寶雖不言嘉言未嘗不能行也諸公有書寶為之序

送僉憲馬君赴河南序

近者數月吾僚擢按察僉事奉勅督屯田之政者三人桂林胡用晦之陝西瀘州鄧志夔之廣東而西安馬君應房則河南也陝西當西北二虜廣東當東南諸夷而河南則居中原故論者皆謂陝廣為急河南為緩陝廣為難河南為易君子曰不然也屯田之法兵農兩便及

其弊也農病於走輸兵驕於坐食有司者玩而廢之久  
矣豈獨陝廣哉然陝廣之地時有所警一申飭焉乃若  
中原則異於是夫省則慎忘則弛者常物之大情也由  
是觀之則陝廣河南孰緩孰急孰易孰難當有間矣且  
夫河南心腹也陝與廣四體也四體有疾則攣蹠痿痺  
立見其害至於心腹受病怔癥鬱蠱如火未然如水未  
決不啻無恙一旦發作四體雖強猶恐不救於殆而況  
手足方仰於中者乎此又緩急難易之辨也予不敏聞

而是之既有以贈胡鄧二君應房行復書為別應房關中之望其在戶曹莫不賢之嗚呼審緩急之宜者存乎識備難易之用者存乎才吾知應房其不負於君子之論哉

遠遊詩序

遠遊詩若干首柴墟儲先生倡之白巖喬先生輩諸公和之以贈江東徐君子仁者也子仁少負才氣攻古文詞歷叅諸名家書法時時有所自得由是有聲江東予



曩獲一再見獨心賞其精逸而以不久與居為恨既而  
解擯遊於四方者於今數年矣予意其羈流頓漫之際  
必有鬱焉無聊憤焉不平肆焉自譽且嘲之態而子仁  
之笑言坐起食飲咏歌猶昔日也君子謂子仁於是乎  
達為之賦遠遊焉余嘗觀戰國遊士挾策走諸侯縱橫  
捭闔一出其頰舌而往往有離憂之感及漢興郡縣海  
內叅建王國士之東西遊者亦或以倦歸何子仁獨異  
是哉蓋漢之士其遊也以宦戰國之士其遊也以說二

者不能無求求之有得有不得得不得累乎其心欲勿著於外難矣今子仁曾有是乎夫烏得而不異也然子仁之遊亦非無求者吾不暇悉試言其大則觀秦碑於泰山覽大風歌於沛考東都之石經訂晉刻於蘭亭讀唐頌於浯崖搜兩宋儒者之手墨於閩洛之地探禹穴之秘訪殷槃周鼎諸銘識而句疏之入鄒魯之墟左右顧而括拾所遺目收其精手隱其度神會其機而心藏其妙有不求求無不得得而玩玩而樂樂而相忘焉是

故飛沉所至見王公而不求貴其身遇岳牧而不求用  
其術茲其求也夫豈昔人之求歟其遊之異蓋無足恠  
者不然則夫

音無

夫也芒屨布袍足跡半寰宇其亦勞矣

抑有不勞而求在其中者曰隱遠遊之餘孰能為子仁  
賦卜居哉金陵天下之名勝也昔之人託隱於是者多  
矣子仁歸其為我弔機雲之宅登東山尋謝公舊蹟葺  
草堂而棲焉以揖三茆君於雲峯霞嶂之表其不將大  
有所得乎夫是之謂天遊而今之所謂達者又不足以

嘉子仁也作遠遊詩序

分題寓贈詩引

行有贈古也言而詩詩有所指以起者蓋興之流而古之變也故君子不廢焉禮部郎中王君應韶出守陝州寶預設燕餞賓客數人人為二詩詩各有題以寓贈言之意其始作也或談陝之故蹟有底柱者曰此禹功也應韶正色危言表然立於朝識與不識皆知傾仰以是往治陝其濟乎其盍賦是或曰蔽芾甘棠召伯所爰自

陝以東皆是也而始於陝故今以甘棠名驛召公之遺  
應韶繼之某盍賦是二題既立僉以為然然作者尚多  
詞厭複出遂相與閱陝志歷選名勝以盡古今之變而  
底柱甘棠大矣烏乎有底柱之德則可振天下之擊撼  
有甘棠之德則可綏天下之流離豈獨一郡哉至於斟酌  
議擬激昂開闔固有道焉及其歸也無愧於古而已  
矣焉知今之舉不為他日之故也諸作既成寶僭為引

送陳大叅序

內省與外藩相承而體稍異藩有使有叅省有卿有亞  
然省之職兵不兼民刑不兼禮藩之治江不與浙陝不  
與山內以職分外以地總體雖若異其於政也所繫實  
等吾嘗觀於藩使宣之叅叅之叅之云者利得舉之病  
得去之弛得張之塞得通之迫得緩之猛得寬之蓋凡  
藩之事無所不與焉者也然則叅之體雖與使異其於  
政也所繫亦等而中州當四方之會有觀瞻之道焉視  
他藩為重其奉勅以督賦者重輕損益斟之酌之使上

裕於國下裕於人視他叅尤重陳君之為之也不亦宜乎蓋君抱長才負高識一宜為有才識而不自露二宜為在戶部若干年會計通融無弗講究三宜為吾以是道叅之重者告之使自信毋自淺也再擢而使復旋於內因是行也而預期之豈予佞哉豈予佞哉

送泉守張侯序

今之守古之所謂牧也所謂師也所謂將也夫守之云者守其土地民人之謂也故必有牧之愛有師之嚴有

將之備而后可以言守此古之為守者所以難也今之制雖與古異而三者之責隱然在於其躬使徒知其一而不知其二則其碌碌於案牘役役於征輸勤勤於訟獄以與羣吏爭能無足恠者苟才長於倖廉優於令勤愈於幕不啻足矣問其所以撫綏所以化導所以防禦皆不與焉此今之為守者所以易也雖然守之設豈端使然哉居今之職而求古之道道不狃於易而務為其難吾於泉守張侯有望焉侯以進士起家滇南官戶部主



事歷員外郎郎中凡若干年某無似實與比署嘗見其  
政務之暇恒讀古書鑒觀古人經濟之蹟而思慕效之  
意若不滿乎今人之所為者其不狃於易而必務其難  
也審矣況泉為東南望郡可以有為之地哉泉守之故  
吾未能悉其在宋世得王忠文真文忠兩公焉史稱忠  
文之治先以恤民禮賢講經詢政文忠之治先以寬商  
抑豪設屯備寇凡若茲類皆今之守所不暇為且謂不  
必為者而二公為之烏乎如是為愛如是為嚴如是為

備殆庶幾乎吾所謂牧所謂師所謂將者而豈今之所  
謂守云者哉侯視篆之餘謁兩公祠下退而尚論其世  
將必有奮然者矣

送胡鄖陽序

鄖為地介四省間山深六七百里水復湍悍上下甚難  
其中農田之外又有沙礫淘采之利足以淵藪逋逃故  
盜賊往往發發必數年虜我王師而後克定成化間都  
御史原公奉命靖寇始奏立鄖郡郡稱難治固其所也

弘治初御史建議欲即其郡立三司如各省制者當時  
覆議雖以事體有五不可而卒歸於郡守之得人守亦  
誠難矣哉夫三司閫以統軍內視五府藩以理民內視  
六部臬以平法內視都察院其長貳僚屬各有所分故  
能用又議者之意蓋出於此今不是之舉而獨以郡守  
當之是一人而兼數十人之事也守亦誠難矣哉吾友  
胡君天叙才志英邁學以充之勇以行之遜以出之勤  
以終之蓋古人所謂成章者頃嘗受知於少司徒劉公

公未及薦大司徒周公寔薦之擢守茲郡郡猶昔也守  
猶昔也吾以為在君若無難焉豈特以其人哉蓋有所  
試矣君為主事始在刑曹以善讞稱繼在戶曹以善計  
稱繼巡於邊以善御稱夫善御者必能於軍可以當閭  
善計者必能於民可以當藩善讞者必能於法可以當  
臬以是為郡人用其三我用其一而所謂三者斟酌齊  
量自我出焉則寬猛可以相濟文武可以相資服則撫  
之爭則理之有弗靖則攘之動無所掣靜無所撓必使

夫逋逃吾徒沙磧吾利農田吾業而山水吾防壁之醫  
者鍼砭湯液唯其所用病焉有不愈哉則夫所謂數十  
人者固不若一人者之為簡且要也他日論者必以鄖  
不建三司之說為是而建者為非設謂不然必指胡君  
以為口實已君行同官林君世堅輩須言為贈予不敏  
謹述所聞以要君之成焉

送歐大叅赴浙藩序

薊郡歐君孚先以司徒正郎擢浙江左叅政人之賀君

者皆謂君先嘗奉命賑饑於浙經畫補助吏使其宜民  
利其惠至於今稱君不哀及君自大同入理司事又於  
浙是屬凡其虛實急緩民情吏弊君益盡得之矣今茲  
之往豈不易為也哉以是賀君同然一詞寶不佞竊以  
為君子之道患於無本苟有本焉又能通於天下之務  
則投之所向一皆如志故俎豆軍旅異事同體州里蠻  
貊異地同用王公鬼神異道同感其理然也君英敏公  
勤明習典法屢考屢最大司徒周公實疏薦之其於天

下益至賸其若理也至夥其若簡也亦奚必身嘗親之而後為便哉大抵天下之事雖至亂不能無因雖至治不能無革其勢然也禮曰脩其教不易其俗齊其政不易其宜又曰五方之民皆有性也不可推移君子之所因者如此若夫南士吏北則強而南北士吏南則強而北此固執者之為君子不為也以是而因何有於浙哉雖然道有升降政由俗革革者道之通而習之敝也故詞敝傷忠儀敝蔑質音敝導欲法敝滋奸是以復始救

敝其道並行德以先之風以動之容以銷之已日以待之此固所謂脩且齊者以是而革亦何有於浙哉而必以身嘗親之之為易也或曰子所言者化也今君司以布政為名官以叅政為銜而子言化何居夫政莫大於化化行則政在其中矣同年唐君文載代君為郎以寶辱同年後分當執簡遂命書之

送太子洗馬梁公使安南序

弘治戊午安南國以其君之喪來告我既有弔祭之使



於是有司請封其繼上問在廷孰堪使者乃惟曰太子  
洗馬梁公其人公時侍講東宮上命兼翰林侍讀賜一  
品服奉璽書持節以往命下之日咸謂公以文學之碩  
久在侍從朝夕左右以承燕閒儲闈始學公與輔導境  
外之事乃以煩公寶聞之曰不然聖天子宅中撫外天  
覆地載靡所不臣而遐邇之勢固有不能緊施者故八  
荒四裔凡諸有邦朝貢之來不過鴻臚一見光祿一燕  
主客一賜而已雖侈隆張美贊嘆誦傳而於道德之光

政教之懿固未易悉矧其君其長其庶遠處萬里之外  
者哉惟彼易世之封我則有使使至其國阼揖其君堂  
臨其長庭令其庶必其人焉容以肅之辭以動之文以  
章之武以示之德以將之鉅如河山昭如星漢覲武者  
畏觀文者悅承容者敬受詞者信慕德者服永矢向順  
心喙意貌惟一無二不惟不敢亦有不能蓋國體之重  
王命之尊聖化之盛大於是乎係焉烏乎非懋德宿望  
如公者其何以與此且公為上侍從為儲闡輔導其地

甚密覩公步趨宸宇在目聞公聲音綸渙在耳所謂天  
威咫尺者不啻不違耳矣然則是行也其人唯公其地  
亦唯公非公而誰其宜哉侍御王公敬止公所舉士也  
謂寶言然乃與其友楊君遜夫輩請書以為公贈寶謝  
不獲既次前語復作詩曰惟南有邦曰古交趾易世請  
封廛我命使我使梁公儒宗宗工麟節虎符穆如清風  
公臨其疆與翼翼玉拜受詔義手跪膝椎跣文身覩  
我冠舄望闕如天其何能即曰天之威使寶奉之仁聲

義問浹於獠夷丹沙黃金沉水明珠彼餽我却如沙如  
泥如沙如泥我德惟寶南夷稽首以頌以禱頌禱惟何  
天壽無疆無疆惟休綏我萬方載拜致公奏於明堂

送長垣丞高君序

今年秋偃師高鍾秀以太學生受長垣丞於是其兄鄉  
進士以德方卒業待試君顧而嘆曰某無似一命為丞  
國恩家慶甚重甚厚然竊惟吾高祖郡守祖國相伯父  
司諫兄分教皆美官而吾獨丞焉丞不負吾吾實負吾

世矣蓋其意若有弗滿者其姻友許進士廷綸因其行也須言於寶且道君之意云云寶謂廷綸曰子知高君曷弗告以丞之美乎夫丞者貳令之政以行乎一邑者也一邑之政實通乎天下令主之丞輔之匪令弗理匪丞弗贊故丞也者權輕於郡守而所謂牧愛者同分卑於國相而所謂藩輔者同地踈於司諫而所謂紀綱者同事劇於分教而所謂表率者同同其責不同其名君子不謂之異焉夫階無崇卑職無繁簡事無易難能盡

其道則無不美不能盡其道則官雖美而吾之憂者方  
大求不美以自適且不可得況有美如丞者哉夫以教  
視丞師吾兄以諫視丞師吾伯以相視丞師吾祖以守  
視丞師吾高祖牧愛以本之藩輔以固之紀綱以直之  
表率以臨之宜惟不負丞哉體國承家將於是乎在廷  
綸曰然吾將告之以為官箴

送嚴西安序

今之為守者有二難贖如也猥如也斯二者天下通患

之然而有不患者蓋有天下之才則見其簡而不見其  
蹟有天下之望則見其重而不見其猥是非猥與蹟之  
難難乎其人爾西安天下之大郡也自秦漢以來或為  
都邑或為藩鎮控三邊而制四方經畫酬應於斯為蹟  
其在今日都臺所臨總戎所駐中監所守憲以按之藩  
以統之臬以監之守以一人從事其間於斯為猥是以  
談守之難必以西安先焉始吾華容嚴侯之為西安前  
太宰王公實舉之公郡人也知守之難而侯之才望足

以當之是故拂侯之情違衆惜侯者而用侯侯至郡郡以無事監司體貌加焉人賸侯簡人猥侯重期年而政成今之西安非昔之西安矣雖然侯之志豈止是哉蓋侯嘗閱郡志見古之人宦於斯者宋則韓范唐則韓宋漢則趙張三王至於今稱之不衰思其人尚論其世慨然若恨不能與之上下充是以往將見今之西安又為古之西安也侯在郡于今五年屢以軍民重計為監司所留至是始考三載績侯之才望至是亦可見之然則



猥與隄非所以告侯因侯而論為守之難亦所以頌侯  
云爾戶曹舊僚與君遊者咸謂當有贈寶不佞僭為之  
序

送按察使周公述職序

述職之禮古有之今定為三年一覲其覲也布政司視  
古方伯府視大國州次國縣小國各述所職聽命於天  
子若按察司則視古之監將有異於彼所述者乎無異  
於彼而激揚振勵於其間彼賢也吾從而賢之彼能也

吾從而能之彼勤也吾從而勤之反是焉者吾議黜之  
降之更之俾國之法遠而益彰久而益嚴將四海一家  
而千萬世無弊者唯是焉繫由是觀之則按察之職所  
以綱紀羣有司而其述也亦獨難矣故必覈於采納哲  
於評品公於取舍而後可以合天下之論一或缺焉則  
舉者不以為旌錯者不以為瘡彼羣有司猶可自諉吾  
任激揚振勵之責其誰諉哉雖然使得其人則衡鑑在  
我矩度在我於已取之而盡乎其情聽信不惑於儉近

採納不患於不覈也好尚不信於同異品藻不患於不  
哲也喜怒不遂於愛憎取舍不患於不公也由是與於  
黜陟之說紀綱羣有司而維持乎國之法當無不允者  
矣而孰謂夫激揚振勵之難哉此寶於吾按察使縉雲  
周公述職之行而有是說也公以家學舉進士由良縣  
尹召為御史總諸道章奏出貳按察歷湖廣江西出入  
中外凡若干年文學風操迥出流輩一言一動惟法是  
度不樂佞己不喜絕人案律叅例以平庶獄故凡天下

才有異品事有異類制有異宜而在我之衡鑑矩度恒自持焉其採納也不能不覈其品藻也不能不哲其取舍也不能不公平居且然而況於三年述職一舉一錯係羣有司之黜陟而激揚振勵為國法輕重者哉故必舉一人也若加榮焉而未舉者勸錯一人也若加辱焉而未錯者懲然後無負於法矣雖然十使之選元之重之一路之哭仲淹矜焉古之君子所以為天下者類如此公獨能無意乎公行憲副李公以下各為詩贈寶因

推是說而序之

贈太史羅先生序

太史南城羅公以疾在告既愈而將北上也予適視學  
自建昌之宜黃道於其里因預為公餞公二從子城里  
以諸生侍公起如內予問二生公道所由城曰由浙浙  
之道坦然而迂迂不勝坦其將由之里曰由江江之道  
疾然而險險不當疾其將由之既而公出予以問公公  
曰彼意之耳斯二道者吾皆不由也夫浙之道坦矣而

迂吾嘗由之迂非吾所惡也江之道疾矣而險吾嘗由之險非吾所惡也然而今之行顧皆不由焉吾將由鄱陽出安慶渡江而北道楚陳宋魯齊趙以至於京師蓋為道者三千餘里計其所經濟淮河沁吾將濟焉嵩行恒岱吾將望焉其歷代帝王之都聖賢之里神靈英傑之祠墓吾將謁焉其殘碑斷碣倚壁而臥庭者吾將讀焉其平原沃野為古井田吾將考焉其名城望邑為古封建吾將覽焉其高巖絕壁為古關隘吾將徵焉其大

陵崇邱為古盟會之壇其長坂廣谷為古戰鬪之場吾  
又將弔焉賦焉聞者采之覩者圖之可獻則獻可錄則  
錄行焉而觀觀焉而學學焉而資吾用不徒然也昔者  
吳季札之聘漢司馬子長之遊於今為勝稱之不衰吾  
嘗壯之頃雖西走關陝東涉瀛博南經婺越北抵并冀  
足跡半天下而獨遺中原譬之語道者遺孔孟談功者  
遺禹臯論世者遺唐虞三代君子不謂之知也吾於是  
憾焉故雖迂於浙險於江吾必由之吾且老矣舍是不

由其將焉待哉予聞而笑曰公之於世誠熟矣竒以為  
文危以為行四十始仕仕十有六年尚未徙官吾固知  
公之不畏夫迂與險也雖然中原之道天下之達道也  
其所經誠有如公言者公歸天子所進備顧問退而代  
言且執筆書天下事君之職也有所不對對必以大有  
所不制制必以正有所不紀紀必以直直也正也大也  
天下之達道也其為公之中原也大矣而是行不能無  
資焉雖迂且險公亦何憚哉因問道而得贈公之說二



生者識之吾將徵公矣

湖海巨坊詩序

監察御史謝君德溫巡按江南之明年為正德庚午夏四月大雨既於五月乃止蘇松常三郡之地西自震澤東距海隅大水極目平疇下隰畊而不耔種而不苗者皆是官寺民廬傾圯漂析什六七百姓艱食棄婦鬻子啼號之聲溢於衢路里胥鄉耆徘徊內顧懼於罪累敢怨而不敢告沴氣流行蒸為大疫詢諸父老皆謂百餘

年來所未嘗見君聞之曰是責在我敢不力圖於是檄  
郡守縣令勸分已責以紓貧民而廩賑其尤餓者列狀  
於朝乞蠲稅語極懇切或謂君曰去年李巡按奏災狀  
稍涉疑誤得罪不測公盍緩之君曰吾豈忍計一身重  
吾民患哉於是民欣然若危而復安若死而復蘇蓋湖  
海之間視君如坊而恃以無恐頌聲作焉君子曰信哉  
君之為坊也大矣蘇於天下為水國常決之松江尤甚  
雖中滙有湖東歸有海而不盡洩也故十歲九澇而況

今茲之大水乎是故昔之田疇今之湖海吾民魚焉則  
固其所君當茲重任極力拯救旬月之間凡所設施當  
疏則疏當檄則檄知有民命不知其他民去墊溺以就  
坦夷水若為之殺焉然則湖海之坊孰大於是雖然豈  
止是哉記曰禮以坊德刑以坊淫命以坊欲君於是蓋  
兼舉之可謂知坊者矣使天下之為巡按者皆君其人  
而民焉有溺焉者乎錫之士夫有頌君者詩既成什予  
為之題曰巨坊之詩致仕東陽訓導張綬朝紳益之以

圖將為君還朝之贈而復來請序遂為書之若曰敢與知坊則豈吾之志哉

贈施雪谷序

山之邃而虛者谷谷而雪寒谷也昔者鄒陽吹律而寒谷叅生陰而回陽固亦有機哉非心妙乎理者其孰能與此施君克忠醫術名吳下其於人也扶顛起危蓋亦多矣而名其藥室乃曰雪谷或者曰克忠有生物之心者也宜以陽道自處顧於幽陰焉何哉克忠聞之曰病

死地也藥厲物也醫危術也必遇至難則神功乃出若夫日用飲食少失調攝則夫人能治之而何貴於吾道耶故善醫者先攻其難至陰之中陽道生焉猶寒谷之吹律也雪谷云者是之取爾人以告予予嘗聞之亡者保其存者也此君子傾否之要道也雪谷及此其知之矣吾不知醫嘗讀史記太倉公傳其所稱述蓋皆生死存亡之跡即吾所謂至難者而易者不與焉雪谷蓋多有之吾外孫華漢莖其一也他日傳施君者當為書之

漢莖之父珉具簡請書歸雪谷以為贈

潘氏四封詩序

一家而同官於朝者四人並受推封之典此世之所難也於是所封四老者皆康強無恙釋韋布承命服以榮於鄉蓋尤難焉徽之潘氏以文學行業望於郡久矣由前代以來簪纓相輝於今為盛今所謂官於朝者以位則有若某官某有若某官某皆進士也以屬則某為兄某為弟某為叔在朝署間朝夕相從起居相侍謀議相

質猶在家也蓋潘氏之世德於是乎在乃若四老各封其封皆如子官子拜於朝父拜於家君子以為異故有頌之以言者題曰四封之詩大其事也郎中旦襲而藏之請序於予予惟德可以福徵福不可以數定四老之封其遂已於斯乎由是而至於再於三未可知也倡以四封成以三錫始為家乘之光終為國史之盛所謂尤難者蓋不在乎一時而已也是為序


重訂一峯先生集序

一峯先生羅公在成化初既魁大廷入翰林為修撰未幾上扶持綱常疏改官留都尋以病請歸永豐山中若干年卒又若干年而文集出焉凡若干卷為古律詩若干首碑銘序記諸作若干首而已公天資高邁學博氣充下筆肆然各極其意而閎闊奇偉嚴正端雅讀之令人起敬起畏信哉公之昌於辭也然公志道德而尚名節於文章顧若後焉是以若是其少也集行之後或疑有贗焉以雜乎其間者其子今江陰教諭翰等以予知公



間以質爲予受而閱之既爲定其可信者凡若干首其  
可以信可以無信者爲外集附焉夫公之文豈不敏之  
所敢知哉今天下學士大夫聚而談公之心曰青天白  
日者不謀同聲蓋公論如此是故公之辭可得而擬也  
公之心不可得而易也公之進既不曲學以阿世退乃  
曲筆以徇人乎烏乎此可以知公之文矣昔之君子嘗  
以文知人今也以人知文獨不可乎榦也方懋於學蓋  
夙得於庭訓焉吾於斯重嘆之予比者承乏視學公鄉

既為祠公學宮今於幹之請乃亦不敢辭焉諸所嚮往  
於公具見祠記特舉其槩云



容春堂前集卷十四